



UKA 2015/120-121-122  
08.OKT. 2015  
Kalistat Lund

**Aningaasaateqarfimmi aningaasat katersat ileqqaakkallu erniaat taamaallaat ator-  
neqarsinnaaneri siunertaralugu Aatsitassarsiornermi Aningaasaateqarfik pillugu  
Inatsisartut inatsisaannut nr. 6, 5. december 2008-meersumut allannguutissamik  
saqqummiussinissaannik Naalakkersuisut peqquneqarnissaannut Inatsisartut  
aalajangiiffigisassaattut siunnersuut.**

(Inatsisartunut ilaasortaq, Naaja H. Nathanielsen, Inuit Ataqatigiit)  
aamma

**Kalaallit Nunaata Aatsitassarsiornermi Aningaasaateqarfia pillugu Inatsisartut  
inatsisaata nr. 6, 5. december 2008-meersup allanngortinneqarnissaanut Naalak-  
kersuisut peqquneqarnissaannut Inatsisartut aalajangiiffigisassaattut siunner-  
suut, imaalillugu Inatsisartut ukiut tulleriissut aappassaanni nunatfa karsiata  
aatsaat akuersereeraangata aningaasaateqarfik aallartinneqartassasoq, aatsaallu  
ukiumi naatsorsuiffiusumi aatsitassanit isertitat 10 millioner kronit annertuneru-  
simappata. Inatsisartut inatsisaat ukiup tullissaani 1. januarimi atuutilissaaq  
imaluunniit Naalakkersuisut aalajangiippata. 10 millioner kronit taaneqartut  
Inatsisartut ukiumi pineqartumi Aningaasaqarnermut inatsisaat naapertorlugu  
ataatsimut isigalugu akit akissarsiallu nalingannut naleqqussarneqartassapput.**

(Inatsisartunut Ilaasortaq, Naaja H. Nathanielsen, Inuit Ataqatigiit)  
aamma

**Kalaallit Nunaata Aatsitassarsiornermi Aningaasaateqarfia pillugu Inatsisartut  
inatsisaata nr. 6, 5. december 2008-meersup allanngortinneqarnissaanut  
kingusinnerpaamik UPA2016-imi Naalakkersuisut peqquneqarnissaannut  
Inatsisartut Aalajangiiffigisassaattut siunnersuut, imaalillugu Kalaallit Nunaata  
Aatsitassarsiornermi**

**Aningaasaateqarfia pillugu Inatsisartut inatsisaanni isertitanut paasinninnera  
namminersorneq pillugu inatsimmi aatsitassarsiornermit isertitanut paasin-  
ninnermit immikkoortinneqassasoq. Allannguinnermi tigussaasumik atortut,  
soorlu oliamik maqisuunnginnissamut atortut, illuutit sanaartukkaUunniit allat  
atortullu Kalaallit Nunaata Aatsitassarsiornermi Aningaasaateqarfiani aatsitassar-  
siornermit isertitatut naatsorsuutigineqanginnissaat allanneqartariaqarpoq.**

(Inatsisartunut ilaasortaq, Naaja H. Nathanielsen, Inuit Ataqatigiit)

Aningaasaqarnermut Akileraartarnermullu Ataatsimiititaliap, Inatsisartunut Ilaasortap Naaja  
H. Nathanielsen-ip siunnersuutai pingasut nalilersuiffigereersimallugit inassuteqaateqarput.

Inuit Ataqatigiinnit nuannaarutigaarput aalajangiiffigisassatut siunnersuutit pingasuusut  
kiisami inaarneqaatissaminnik suliarineqalermata. Ukiuni arlalialunngulersuni pineqartut  
maanni Inatsisartuni sammineqartareersimapput, Inatsisartunullu qinersinerit patsisigalugit  
naammassivillugit suliarineqarsinnaassarsimanatik. Soorluttaaq aamma  
Aningaasaqarnermut Siunnersuisooqqatigiit nalunaarusiaminni pineqartunik  
tikkuagaqartarsimasut.

Aatsitassarsiornermi aningaasaateqarfiup qajannaatsumik inissisimanerata  
qularnaarsimaneqarnissaa inuiaqatigiinnut pingaaruteqaqaaq. Aatsitassanit aningaasat  
isertinneqarumaartussat annertunerpaamik iluanaaruteqarfiginissaat kikkunnit tamanit

soqutigineqarpoq, aamma nunatta avataanniit. Aatsitassat nungukkumaartussat matumani pineqarmata, pingaartinneqartariaqarpoq isertitat aningaasaateqarfimmi inissisimajumaartussat mangiarneqarlutik naleerukkiartuaartinneqarsinnaannginnissaat.

Nungukkumaartussanik nungusaaneq kinguaassat pisuussutigiumaagaannik ilanngartuinerummat niuernerliorfigineqannginnissaat inatsisitigut qularnaarluarniarneqarmat isumaqatigaarput.

Aningaasarsioriaatsip nutaap aqulluarniarneqarluni inuiaqatigiinnut appakaatinneqarnissaa pingaaruteqarpoq. Aningaasat sungiusimasatsinniit annertunerusut nunatsinni kaaviihaalissagaluarpa niuerutaalerlutillu qularnaarsimaneqartariaqarmat nunap aningaasaqarnikkut ineriartornera nakkutigineqarluartumik aqunneqarsinnaasumillu pinissaa.

Inatsisit Aatsitassanut Aningaasaateqarfimmut tunngasut allanngortinneqarnerisa kingunissaat makkununga qularnaarinnissutaassammat nuannaarutigaarput:

- Aningaasaateqarfik aningaasavinnik immerneqassasoq, naleerukkiartorsinnaassut soorlu atortut, sanaartukkat assigisaallu pinnagit.
- Aningaasaatit tunngaviusut atorneqaqqusaannginnissaat.
- Aningaasanik katersisoqaqqaassasoq, erniat ingerlatsinermut matussusiisinaalerserlugit.
- Erniat kisimik aningaasanut inatsisini atugassiissutigineqarsinnaassasut.

Siunnersuutit siullermeersumik oqallisigineqarneranni oqaaseqaatigisavut innersuussutigalugit, Aningaasaqarnermut Akileraartarnermullu Ataatsimiititaliap inassuteqaatai qujassutigaaavut. Inuit Ataqaatigiinnit immikkoortut pineqartut pingasut tamaasa akueralugit taasissaagut.